

Apríl 2022



Verklagsreglur

Samstarf við íslensk félagasamtök í
þróunarsamvinnu

Kynningar- og fræðslustyrkir

Útgefandi:

Utanríkisráðuneytið

Apríl 2022

postur@utn.is

<https://www.utn.is/felagasamtok>

Umbrot og textavinnsla:

Utanríkisráðuneytið, alþjóða- og þróunarsamvinnuskrifstofa

©2022 utanríkisráðuneytið

Efnisyfirlit

1. Inngangur	4
2. Tegundir styrkja	5
3. Styrkhæfi, styrkupp hæðir og samstarfsaðilar	6
3.1 Styrkhæfi félagasamtaka	6
3.2 Styrkupp hæð og mótframlag	6
3.3 Málefnaflokkar og heimsmarkmið	7
4. Gerð umsókna	8
4.1 Skráning umsóknar	8
4.2 Að fylla út umsóknareyðublaðið	8
5. Mat umsókna	10
5.1 Frummat	10
5.2 Matshópur	10
5.3 Tilkynning um úthlutun	11
5.4 Trúnaður	11
6. Framkvæmd og eftirlit	12
6.1 Fjármálastjórnun	12
6.2 Greiðsla styrkja	12
6.3 Samningar	12
7. Skýrslur	13

1. Inngangur

Verklagsreglur þessar gilda um úthlutanir kynningar- og fræðslustyrkja til íslenskra félagasamtaka í þróunarsamvinnu. Gilda þær samhliða reglum nr. 1035/2020 um styrkveitingar utanríkisráðuneytisins til félagasamtaka og fyrirtækja í þróunarsamvinnu.¹

Samstarf við félagasamtök hefur það að markmiði að hvetja til þátttöku og framlags þeirra til þróunarsamvinnu Íslands. Jafnframt er áhersla lögð á að vekja athygli almennings á þróunarsamvinnu og þjóna þar kynningar- og fræðsluverkefni mikilvægum tilgangi.

Í stefnu Íslands um alþjóðlega þróunarsamvinnu segir að Íslensk stjórnvöld leggi áherslu á upplýsingagjöf, kynningu og fræðslu um heimsmarkmið Sameinuðu þjóðanna og alþjóðlega þróunarsamvinnu. Markmiðið verði að auka skilning á þeim hnattrænu áskorunum sem til staðar eru, auka gagnsæi, skilvirkni og stuðla að aukinni þekkingu meðal almennings um málaflökkinn. Einnig skuli árangri af þróunarsamvinnu og mannúðarstarfi verða komið á framfæri við almenning með viðeigandi umfjöllun sem byggist á virðingu fyrir fólki og viðkvæmum hópum. Eiga þessar áherslur við þá styrki sem þessar verklagsreglur fjalla um.

Lögð er áhersla á að nýta nýjar hugmyndir og nálganir við kynningarstarf. Ólíkar leiðir verði nýttar til að ná til almennings, m.a. með gagnvirkum gagnaveitum, samfélagsmiðlum og samstarfi við menntastofnanir, fjölmiðla, félagasamtök, háskólasamfélagið og landsskrifstofur alþjóðastofnana. Árangri af þróunarsamvinnu skal vera komið á framfæri við almenning með viðeigandi umfjöllun sem byggist á virðingu fyrir fólki og viðkvæmum hópum.

Í verklagsreglum þessum verður fjallað um hvaða verkefni teljast styrkhæf til **kynningar- og fræðsluverkefna**, styrkhæfi aðila, feril umsókna og fleira.

Verklagsreglurnar eru birtar með fyrirvara um breytingar í kjölfar yfirstandandi óháðrar ytri úttektar á málaflökknum.

¹ Sjá reglur á vef Stjórnartíðinda: <https://www.stjornartidindi.is/Advert.aspx?RecordID=d9180aab-a8ec-4cab-a5f4-e5a26dd074ab>

2. Tegundir styrkja

Kynningar- og fræðsluverkefni skulu koma til framkvæmdar á Íslandi. Þessum verkefnum er m.a. ætlað að auka þekkingu almennings á alþjóðlegri þróunarsamvinnu annars vegar og efla þekkingu eða stofnanagetu umsækjenda í tengslum við þróunarsamvinnuverkefni hins vegar.

Styrkir eru veittir til afmarkaðra og tímabundinna verkefna ekki lengur en til eins árs í senn. Heimilt er að ákveða áherslur við hverja úthlutun og skuli þess vera getið í auglýsingu. Slíkar áherslur útiloka þó ekki styrki til annarra verkefna.

Ekki eru veittir styrkir til rekstrar eða umsýslu félagsamtaka, né til kynningar- og fræðsluverkefna eða viðburða sem þegar hafa átt sér stað.

3. Styrkhæfi, styrkupp hæðir og samstarfsaðilar

Alþjóða- og þróunarsamvinnuskrifstofa utanríkisráðuneytisins fer með umsýslu styrkja til kynningar- og fræðslumála á vegum félagasamtaka og er í samræmi við reglur um styrkveitingar utanríkisráðuneytisins til fyrirtækja og félagasamtaka í þróunarsamvinnu nr. 1035/2020.

Sérstakar áherslur við úthlutun, ef einhverjar eru, eru ákveðnar af ráðuneytinu og skulu þær koma skýrt fram í auglýsingum um styrki hverju sinni.

Sækja má um styrki til verkefna sem unnin eru í eigin nafni félags, verkefna sem unnin eru í samstarfi við önnur félagasamtök eða í samstarfi við aðra samstarfsaðila, t.d. fyrirtæki eða fræðasamfélagið.

3.1 Styrkhæfi félagasamtaka

Styrkhæf félagasamtök skulu a.m.k. uppfylla eftirtalin skilyrði:

- Vera skráð í fyrirtækjaskrá ríkisskattstjóra sem félagasamtök, skv. rekstrarformi eða starfsgreinaflokkun, eða vera skráð sem félag til almannaheilla með starfsemi yfir landamæri skv. lögum nr. 119/2019.
- Skulu ekki rekin í hagnaðarskyni (e. non-profit).
- Hafa sett sér lög og hafa starfandi stjórn.
- Félagsmenn, styrktaraðilar eða stuðningsaðilar séu a.m.k. 30 talsins.
- Hafa lagt fram staðfestan ársreikning.

Landsnefndir alþjóðastofnana sem taka við beinum framlögum frá íslenskum stjórnvöldum eru gjaldgeng til styrkja fyrir kynningar- og fræðslumál.

Nánar má lesa um styrkhæfi í reglum utanríkisráðuneytisins um styrkveitingar til félagasamtaka og fyrirtækja í þróunarsamvinnu nr. 1035/2020.

3.2 Styrkupp hæð og mótframlag

Styrkur til kynningar- eða fræðsluverkefni getur numið 80% af verkefnakostnaði og skal mótframlag félagasamtaka því nema að minnsta kosti 20%.

Í umsókn skal gera grein fyrir því hvernig styrkþegi hyggst háttta mótframlagi sínu. Hægt er að uppfylla mótframlagið með eigin fjárframlagi, fjárframlagi annarra samstarfsaðila eða vinnuframlagi.

Mótframlag má ekki greiða með opinberum styrkjum, hvorki íslenskum né erlendum. Í umsókn skal tilgreina aðra styrki sem verkefnið hefur tryggt sér eða gerir ráð fyrir á styrktímanum.

3.3 Málefnaflokkar og heimsmarkmið

Í öllum umsóknum skal tekið fram að hvaða heimsmarkmiðum er unnið í viðkomandi verkefni, þar með talið undirmarkmið. Nánari upplýsingar um heimsmarkmiðin og undirmarkmið þeirra má finna á upplýsingasíðu um heimsmarkmiðin.²

Einnig skulu upplýsingar í tengslum við málefnaflokkka þróunarsamvinnu (e. purpose codes) skv. skilgreiningu þróunarsamvinnunefndar Efnahags- og framfarstofnunarinnar (OECD DAC) fylgja verkefninu.³ Málefnaflokkar þessir eru nauðsynlegir fyrir skýrslugjöf ráðuneytisins til OECD DAC. Hægt er að flokka verkefni með fleiri en einum málefnaflokki.

Flest kynningarverkefni má t.d. flokka undir kóða #99820 – Promotion of development awareness.

² Sjá nánar heimsmarkmið SP: <https://www.heimsmarkmidin.is/> og <https://sdgs.un.org/goals>

³ Sjá nánar málefnaflokk OECD DAC: <http://www.oecd.org/development/financing-sustainable-development/development-finance-standards/purposecodessectorclassification.htm>

4. Gerð umsókna

Umsóknum skal skilað til utanríkisráðuneytisins í gegnum þar til gert eyðublað sem finna má á www.utn.is/felagasamtok.

Umsóknum ásamt fylgigögnum skal skila með tölvupósti á netfangið felagsamtok.styrkir@utn.is innan auglýsts umsóknarfrests hverju sinni.

4.1 Skráning umsóknar

Umsóknir, þ.e. umsóknareyðublaðið sjálft skal vera á íslensku, eftir því sem við á, en önnur fylgiskjöl svo sem verkefnaskjöl, rökrammar, kostnaðaráætlanir og fleira mega vera á íslensku eða ensku.

4.2 Að fylla út umsóknareyðublaðið

Fylla skal út alla reiti í umsóknareyðublaði.

Umsóknum ásamt fylgigögnum skal skila með tölvupósti á netfangið felagsamtok.styrkir@utn.is innan auglýsts umsóknarfrests hverju sinni. Nánari upplýsingar um umsóknareyðublaðið, fylgigögn og fleira má finna á www.utn.is/felagasamtok.

Eftirfarandi er lauslegt yfirlit yfir þau gögn sem senda þarf með umsóknum, vinsamlegast athugið að listinn er ekki tæmandi:

1. Upplýsingar um umsækjanda, bæði tengilið umsóknar og upplýsingar um þau samtök sem sækja um.
2. Verkefnalýsing í nokkrum skrefum (sniðmát í boði ef þarf)
 - Val um nýliðaverkefni eða almenn þróunarsamvinnuverkefni
 - Verkefnaheiti á íslensku og ensku
 - Samstarfsaðili/aðilar (ef við á)
 - Áætluð lengd verkefnis
 - Kostnaður verkefnis settur fram í íslenskum krónum
 - Stutt samantekt/lýsing á verkefni
 - o Markmið
 - o Markhópur
 - o Væntanlegur afrakstur/árangur
 - Málefnaflokkur/flokkar þróunarsamvinnu (e. purpose codes)
 - Heimsmarkmið SP
3. Fylgigögn sem mikilvægt er að skila
 - Yfirgripsmikið verkefnaskjal
 - Fjárhagsáætlun vegna verkþátta á vettvangi og vegna annarra þátta er lúta að verkefnisumsjón.
 - Yfirlit yfir áherslur samtakanna og samstarfsaðila í verkefninu
 - Ársskýrslu síðasta starfsárs.

- Ársreikningi síðasta starfsárs yfirförnum af löggiltum endurskoðanda líkt og tekið er fram í lið 3.1. í verklagsreglum þessum.
- Nafnalista yfir skipan stjórnar samtakanna.
- Afriti af lögum samtakanna
- Staðfesting að félagsmenn séu yfir 30 talsins

Ráðuneytið áskilur sér rétt til að kalla eftir viðbótargögnum og skýringum ef þörf krefur.

Almennar leiðbeiningar um verkefnislýsingu, sniðmát fyrir tímaramma, fjárhagsáætlun og rökramma mun vera að finna á vefsvæði ráðuneytisins (www.utn.is/felagasamtok).⁴ Eru sniðmátin ætluð til leiðbeiningar um hvaða efnispætti skjölin skulu innihalda. Er félagasamtökum frjálst að aðlaga merki og útlit sniðmátsins eftir því sem við á.

⁴ Sjá nánar: <https://www.utn.is/felagasamtok>

5. Mat umsókna

5.1 Frummat

Áður en umsókn fer til umfjöllunar hjá matshópi fer starfsmaður ráðuneytisins yfir umsóknir og kannar hvort þær uppfylli lámarkskröfur um styrkhæfi.

Ef einhverjar upplýsingar vantar skal láta umsækjanda vita og gefst umsækjendum kostur á að gera bragarbót innan fimm virkra daga. Ef fylgigögn berst ekki innan þess tíma er umsókn hafnað vegna formgalla og svarað með viðeigandi skýringum.

Styrkhæf félagasamtök skulu uppfylla eftirtalin skilyrði:

- Vera skráð í fyrirtækjaskrá ríkisskattstjóra sem félagasamtök, skv. rekstrarformi eða starfsgreinaflokkun, eða vera skráð sem félag til almannaheilla með starfsemi yfir landamæri skv. lögum nr. 119/2019.
- Ekki vera rekin í hagnaðarskyni (e. non-profit).
- Hafa sett sér lög og starfandi stjórn.
- Félagsmenn, styrktaraðilar eða stuðningsaðilar séu minnst 30 talsins.
- Hafa lagt fram staðfestan ársreikning.
- Hafa lagt fram verkefnaskjal og önnur fylgigögn.

5.2 Matshópur

Ráðherra úthlutar styrkjum af fengnu álit matshóps sem skipaður er þremur einstaklingum með þekkingu á málaflokknum. Matshópur þessi vinnur út frá skilgreindum gæðaviðmiðum, verklagsreglum og reglum um styrkveitingar utanríkisráðuneytisins til félagasamtaka og fyrirtækja í þróunarsamvinnu nr. 1035/2020.

Umsóknir skulu metnar á faglegum forsendum og þeim gefnar einkunnir á grundvelli gæðaviðmiða. Gæðaviðmiðin byggjast á stefnu Íslands um alþjóðlega þróunarsamvinnu og sýna hlutfallslegt vægi matsþátta og taka mið af tilgangi stuðnings utanríkisráðuneytisins við verkefni félagasamtaka. Auk formaskilyrða er litið til þátta eins og gildis verkefnis fyrir markhópinn, sjálfbærni verkefna, færni og getu umsækjenda til að framkvæma verkefnið og ná árangri.

Við mat á verkefnum þar sem tiltekinn sérþekkingar er þörf, getur hópurinn leitað álits annarra sérfræðinga. Matsaðilum er skylt að upplýsa um hagsmunatengsl sín við einstök verkefni eða umsóknaraðila. Séu slík tengsl fyrir hendi, skal sá aðili segja sig frá mati á viðkomandi verkefni.

Rýnihópur alþjóða- og þróunarsamvinnuskristofu fjallar um styrkveitingarnar á grundvelli fyrirbyggjandi álitsgerðar matshóps og gildandi leiðbeininga. Endanleg ákvörðun um styrkveitingu er í höndum ráðherra.

Við úthlutun styrkja skal tryggja fjölbreytni verkefna, og gæta jafnræðis, hlutlægni, gagnsæis og samkeppnissjónarmiða. Mat á umsóknum skal einkum

byggjast á eftirtöldum almennum sjónarmiðum, en einnig sértækum sjónarmiðum eftir atvikum:

- gildi og inntak verkefnis er verulegt við að auka upplýsingagjöf, kynningu og fræðslu um alþjóðlega þróunarsamvinnu
- raunhæfar verk- og fjárhagsáætlanir liggja til grundvallar verkefnis
- umsækjendur og aðrir þátttakendur hafa viðeigandi/sterkan faglegan bakgrunn
- nýjar hugmyndir og nálganir eru nýttar við kynningarstarf
- verkefni og umfjöllun endurspeglar virðingu fyrir fólki og viðkvæmum hópum
- þekking og geta viðkomandi samtaka aukist í kjölfar fræðsluverkefnis sem miðar að getu uppbyggingu

5.3 Tilkynning um úthlutun

Ráðuneytið skal svara öllum umsóknum skriflega og færa rök fyrir niðurstöðu. Jákvæð afstaða til styrkumsóknar getur verið bundin skilyrðum, t.d. um endurskoðun á fjárhagsáætlun eða lagfæringu á verkefnisskjali. Slík skilyrði skulu tilgreind í svari ráðuneytisins.

Í þeim verkefnum sem ráðherra hefur samþykkt úthlutun til er boðað til fundar vegna undirritunar samnings eftir því sem við á.

5.4 Trúnaður

Umsóknir, þar með talið fylgiskjöl umsókna og matsblöð flokkast sem trúnaðargögn. Þau gögn eru eingöngu notuð við mat á umsóknum og eru ekki aðgengileg öðrum en matshóp og starfsmönnum ráðuneytisins í þeim tilgangi að leggja mat á umsóknirnar. Öll umsóknargögn og matsblöð eru varðveitt í málaskrá utanríkisráðuneytisins.

Allir þeir aðilar sem koma að afgreiðslu og mati umsókna hjá ráðuneytinu eru bundnir þagnarheiti.

Lýsing á verkefninu í hnotskurn, nafn styrkþega og upphæð styrks er þó undanskilin trúnaði og er birt á heimasíðu ráðuneytisins ef til úthlutunar kemur. Einnig er unnt að skilgreina frekar notkun á efni í tengslum við verkefnið í samningum.

6. Framkvæmd og eftirlit

6.1 Fjármálastjórnun

Styrkþegar skulu viðhafa góða stjórnarhætti og sýna ráðdeild við nýtingu styrksins. Styrkþegar skulu setja stefnu um afstöðu sína og ráðstafanir gegn spillingu og siðareglur varðandi meðferð fjár. Styrkfé má aldrei renna beint til opinberra starfsmanna, íslenskra eða erlendra ríkja, í því skyni að greiða fyrir framgangi verkefnis sem sótt er um styrk fyrir. Styrkþegum er skylt að setja inn ákvæði um afstöðu og ráðstafanir gegn spillingu í þá samninga sem þeir gera við verktaka og undirverktaka í tengslum við þau verkefni sem fá styrki.

Styrkþegar skulu án tafar upplýsa ráðuneytið skriflega um ólögmætar gjörðir, spillingu eða misnotkun fjár sem styrkþegar komast á snoðir um eða þeim hefur verið bent á, hvort sem slíkt á sér stað innan samtaka styrkþega sjálfra eða samstarfsaðila þeirra.

6.2 Greiðsla styrkja

Greiðslur styrkja skulu berast tímanlega inn á íslenskan bankareikning félagasamtakanna og ekki síðar en tveimur vikum eftir undirskrift samnings. Ársreikningum, yfirförnum af löggiltum aðilum, vegna verkefnis skal skila til ráðuneytisins, þar sem fram koma tekjur og útgjöld þess. Til viðbótar skal ábyrgðarmaður styrkþega, sem getur verið framkvæmdarstjóri eða prókúruhafi samtakanna, votta undirritaða reikninga verkefnisins.

6.3 Samningar

Gerðir eru skriflegir samningar um alla styrki. Í samningum er m.a. kveðið á um útborgun styrkja, meðferð fjármuna og skýrsluskil.

7. Skýrslur

Þegar verkefni er lokið skulu styrkhafar skila sundurliðuðu uppgjöri til ráðuneytisins eigi síðar en sex vikum eftir að verkefni lýkur ásamt stuttri, skriflegri greinargerð (lokaskýrslu) um árangur þess. Í greinargerðinni skal koma fram hvernig fræðslu- eða kynningarverkefni hefur uppfyllt þau árangursviðmið sem sett voru fram í umsókn.

Reynist kostnaður félagasamtaka lægri en áætlanir í styrkumsókn gerðu ráð fyrir, skulu félagasamtökin endurgreiða ráðuneytinu mismuninn þegar uppgjör liggur fyrir.

Ráðuneytið áskilur sér rétt til að skoða þau bókhaldsgögn sem viðkoma nýtingu styrkja vegna kynningar- og fræðsluverkefna.

